

Mwakan te Boki ae Tabu

Iroun Unimwane Richard G. Scott

Man te Kooram N Abotoro n te Tengaun ma Uoman

Boki aika a tabu ai aron bakete n taura are e kaotai nanora ao e karekea te nne ni kairaki ao ni kaungaaki mai karawa.

Naake ibuakora ake a roko n te bakete n tain te maungatabu a namakina mwaakan ami tataro. Ti kainnanoi, ao ti karabwai ngkami ibukina.

Tamara are i Karawa E oota ibukira bwa ti na karaoi rikirake aika a tangiraki inanon maiura n tarataraaki, ti na kainanoa kaitarakin kataitai aika kanganga. Tabewa mai buakon aikai a bon kuri ni konaira. E katauraai bwaai ni mwakuri ni buokira n tokenikai inanon ara tai ni maiu. .Teuana mai buakon bwai ni mwakuri aikai bon booki aika tabu.

Inanon ririki ngkoa Tamara are i karawa E kairi nanoia aomata aika rineaki ao n tokenikai ni kaka, rinanon ana kairi te Tamnei are Raoiroi, katokan kanganga n te maiu aika korakora. E a tia n kaungai nanoia tooro n kariaia n taua mwiin katokakia bwa kanga aekan te aeniboki ibukia Natina ake a onimakina Ana Banna ni kakukurei ao inanon Natina te Mwaane ae tangiraki, Iesu Kristo. Ti kona n karekea kairirara aei n taai aikai n rinanon te kaubwai are ti arana bwa mwakuri aika raraai—are te O Tetemanti. Ao te Nu Tetemanti, Ana Boki Moomon,te Doctrine ao Covenant ao te Pearl of Great Price

Bukina bwa booki aika tabu a kamwakuraki man te reitaki ae roko rinanon te Tamnei ae Raoiroi, bon taian koaua aika itiaki. Ti riai n aki katabeira ibukin korakoran iangoan taekan kanoan taian boki aika tabu ngkai bon te Tamnei ae Raoiroi ae te bwai ni mwakuri are kaungaira man kairiia naake a korei booki aika tabu.

Booki aika tabu bon aekan taura aika karako otaia ake a kaota ara iango ao n kairiira ao n kaungaira mai ieta. A kona n riki bwa te king ni kauka te kawai nakon te reitaki nakon Tamara are i karawa ao Natina ae Tangiraki ae Iesu Kristo.

Taian boki aika tabu a anganiira te korakora ni kona n tataekina raoi kanoana. A kona n riki bwa rao aika korakora n akea totokoaia n te Aonaaba ke ni kanoan te bong. A bon tauraai ngkana a kainnanoaki. Kamanenakia a katauraao aan te koaua are kona ni kaotaki iroun te Tamnei are Raoiroi Reiakinan, iangoakin, ukoukoran, ao kakaurigan booki aika tabu bon aekan kanoakin te kabineti, ma raao, bonganan, ao taian koaua are a kona ni kaotaki n te tai ae kainnanoaki iai n taabo nako i aonaaba.

Te mwaaka ae korakora e kona n reke man uringakin booki aika tabu. Uringakin te boki

ae tabu bon karaoran te iraorao ae boou. Bon ti tebo ma kuneakin temanna ae boou are e kona ni ibuobuoki n tain te kainnana, n anga te kairiri ao te karaunano, ao n riki bwa bwain kaungan te bitaki ae boou. N aron te katoto, karekean uringakin te Areru aio e a tia n riki nakoiu bwa kanoan te mwaaka ao te ataibwai.

“Bon Ana bwai te Iehova, aba nako ma kanoaia ma aonaaba ma ake a maeka iai.

“Bwa E katea aonaaba iaon taian tari ao E kateimatoa iaon taian raan.”

“Ao ai antai ae na na ararake n ana maunga Iehova? Ao ai antai ae na tei n ana tabo are tabu?

“Bon ane iai baina aika aki bareka, ao iai nanona ae itiaki; ane tuai ni kawaerakea nanona nakon te bwai ae akea manena, ma n taetae n tuea ni kewe.”

“Ane e na anganaki te kabaia mairoun Iehova, ma te raoiroi mairoun te Atua are kamaiua.” (Taian Areru 24:1–5).

Iangoakin te boki ae tabu n aron anne e anga te kawai nakon te maiu. E kona te boki ae tabu ni buata te aa ni boutoka. A kona ni katauraioia raao aika aki kantaningaaki mwaitia aika kona ni buokiira. Kibun taekan te boki ae tabu ae uringaki e riki bwa te rao ae reitinako are e aki kamamaraki ni kawain te tai.

Iangoan kibun te boki ae tabu e kona n riki bwa te king ni kauki kaotioti ma te kawai ao te kairiri mairoun te Tamnei are Raoiroi. Booki aika a tabu e kona ni karaua te nano ae kiriwe, n anga te rau, te kantaninga, ao kaokakin te onimaki inanon katein temanna n kataea ana kai kangangan te maiu. Iai mwakaia ae korakora ni katokan kangangan te namakin ngkana iai te onimaki inanon te Tia Kamaiu. A kona ni kakorakora kamaiuan te rabwata.

Booki aika tabu a kona n taekina nanona ae kaokoro n ara tai aika kakaokoro ni maiura, ni kaineti ma kainnanora. Te boki ae tabu are ti na warekia ni mwaitin te tai e kona nanona aika bati ake a boou ao a nano ngkana ti kaitarai kanganga.

Ko kanga ni kamanenai booki aika tabu? Ko mwaken am kaobi? Ko koro taeka n tian mataniwin te bebwa kauringa ana kairi te Tamnei ke te bwai ae ko namakina are e a tia n reireinako ma n ninia nanom? Ko kamanenai ni kabane mwakurin bookin te aro, n aron te O Tetemanti bwa kingin nako aan te koaua aika bongana are e kaira maium ao mwakuri bwa buokau ngke I kataia n tibwaa taekan te euangkerio ma tabeman. Ibukin anne, I tangira te O Tetemanti. I kunei atibun te koaua aika kakawaki iaon baana ni kabane. N aron te katoto:

Ao e taku Tamuera, ti te abakina tangirani karea ni kabuokaki ao karea nako iroun Iehova, ma tangiran iran nanon bwanan Iehova? Noria, e raoiroi riki te iri nanon taeka, nakon karea, ao e raoiroi riki te kan ongotaeka nakon neneaia tibu m'ane. (1Tamuera 15:22).

“Ko na onimakina Iehova n nanom ni kabanea, ao tai mwiokoa oin am ataib'ai.

“Ko na ataia n nakonakom ni kabane, ao e na kaeti kawaim.

“ Tai bakanrabakau i matam; ko na maka Iehova, ao nako man te buakaka....

“My son, despise not the chastening of the Lord; neither be weary of his correction:
“Natiu, ko na tai riba kataeream n reireiaki iroun Iehova; ao tai botu ni boam i Rouna:

“Ba ane E tangiria Iehova ao E boaia; N ai aron te tama ae boa natina ae e tangiria.

“E a kabwaia te aomata ae kunea te rabakau, Ao te aomata ae reke irouna te ataibwai.
(Taekan Rabakau 3:5-7,11-13)

Te Nu Tetemanti bon aan te koaua ae kakawaki:

“Ao E taku Iesu nako ina, Ko na tangira Iehova ae Atuam n nanom ni kabanea ao n tamneim ni kabanea, ao ni wanawanam ni kabanea.

“Moa te tua aei, ao e korakora.

“Ao ai aron naba are te kauoua, are kangai, Ko na tangira raom n ai aron tangiram i bon iroum..

“E bane te tua ma aia taeka burabeti nako n tauraki n tua aika uoua aikai.” (Mataio 22:37–40).

“Ao E taku te Uea, Timon, Timon, noria e bubuti ngkami Tatan bwa e na ioingkami n ai aron te uita:

“Ma I tatara ibukim, bwa e na aki toki ami onimaki: ao ngkana ko a manga rairaki,ao ko na kateimatoaia tarim.

“Ao ngaia e taku nako Ina, te Uea, e a tae nangu ba N a iriko nakon te auti ni kaikain, ao nakon te mate.

“Ao E kangai Iesu, Betero, I tuangko, ba e na bon aki tangi te moa n te bong aei, ngkana ko tuai ni katenua am taeka ba ko aki kinai. . . .

“Ao e noria te ateiaine temanna, ngke e tekateka ike e ota iai n te ai, ao e taratarai, ao e taku, Kai e mena teuaei iroun Teuarei!.

“Ao e kaakea, ao e kangai, Neiko I aki kina.

“Ao imwin tabeua te tai ngke e a manga noria temanna, ao e taku, Raoia naba temanna ngkoe. Ao e taku Betero, Nao Tiaki.

“Ao tao teuana te aua i mwina, ao e kakorakora ana taeka te aomata temanna, ao e kangai, Bon te koaua ba e memena naba teuaei iroun Teuarei; bwa te I-Kariraia.

“Ao e taku Betero, Nao, I aki ata ane ko atongnga. Ao ngke e kume n taetae, ao e tangi naba te moa.

“Ao E rairaki te Uea, ao E tara Betero, Ao Betero e uringa ana taeka te Uea, ngke E kangai nako ina, Ngkana e tuai n tangi te moa n te bong aei, ao ane ko na katenua kaakeau.

“Ao e otinako Betero ao e tang ni korakai”(Ruka 22: 31-34, 56-62)

Ai korakaira nanou n te bwai are e riki nakon Betero n te tai anne.

Te boki ae tabu man D&C e a tia n rangi ni kakabwai maiu n te aro ae bati. E warekaki bwa ti na aki ukoukora taekinan Ana taeka ma ti ukoukora karekean moa Ana taeka, Imwina e na kabwaraki newera, ao ngkana ti iangoia, ti na karekea Tamneina ao Ana taeka, n aron mwakan te Atua n anakin nanoia aomata (Taraa D&C 11:21).

N au motikitaeka, ana Boki Moomon e reirei te koaua ma ootana ae kaokoro ao mwaakana. N aron te katoto:

“Ao ngkai I tangiria bwa kam na nanorinano, ao aantaeka man rau ni kakai butiaki; n onrake n te taotaonaki n nano, ma te taonannano n te tai ae maan; n taubaang ni bwaai ni kabane; ma ni kakaonimaki ni kawakin ana tua te Atua n taai nako ni bubuti ibukin bwaai aika kam kainnanoi, aika bwaai n tamnei ma bwain te rabwata; ma ni karabwarabwa n tai nako nakon te Atua ibukin bwaai ake kam karekei.

“Ao nooria bwa e na iai iroumi te onimaki, te kantaninga ae raoiroi, ao te tangira ae

kororaoi, ao ngkanne kam na onrake ni mwakuri aika a raraoi. (Aramwa 7: 23–24)

Ao teuana riki.

“Ao te tangira ae kororaoi e taotaonaki n nano, ao e akoi, ao e aki bakantang, ao e aki kainikatonga, ao e aki ukoukora oin nanona, e aki kakaiun, e aki iangoa te buakaka, ao e aki kimwareirei n te buakaka ma e kimwareirei n te koaua, e keiakin bwaai ni kabane, e kakoauai bwaai ni kabane, e kantaningai bwaai ni kabane, ao e teimatoa n nanomwaaka ni bwaai ni kabane.

“Ngaia are, tariu aika kam tangiraki irou, ngkana akea iroumi te tangira ae kororaoi, ao bon akea ngkami, bwa akea kabwakan te tangira. Ngaia are, niim ma te tangira ae kororaoi, are te kabane ni korakora iaon bwaai nako, bwa bwaai ni kabane a na kona ni bwaka—

“Ma te tangira ae kororaoi bon ana tangira Kristo ae itiaki, ao e teimatoa n uaa te toki; ao ane e kuneaki irouna n te kabanea ni bong, ao e na bon nakoraoi ibukina.

“Ngaia are, tariu aika kam tangiraki irou, tataro nakon te Tama ma korakoran nanomi ni kabane, bwa kam na kaonaki n te tangira aio, are e a tia ni katoka iaioia ni kabane ake taan irira Natina, are Iesu Kristo ni koaua; bwa kam aonga n riki bwa natin te Atua; bwa ngkana e kaoti ao ti na riki n aron, bwa ti na nooria n arona ngkai; bwa tia aonga ni karekea te kantaninga aio; bwa ti aonga ni kaitiakaki n arona ae e itiaki.”(Moronaai 7:45–48.)

Kainabau ae moan te kakawaki, Jeanene e tatangira Ana Boki Moomon. Inanon ataeinainena, n te roro ae te tebwi tabun te ririki, e riki bwa aan maiuna. Bon ana koaua ao ana bwai n reirei inanon ana tai ni mwaakuri ni mitinare i meang mainiku n te United States. Ngke ti mwakuri n te tabo ni mitinare i Colordoba, Argentina, E korakora ni kaunga kamanenakin ana Boki Moomon inanon mwanangara ni kakaeia ara aomata. Jeanene e kamatoa ni moani bongin maiuna te koraki ake a kamanena Ana Boki Moomon n tainako a na kakabwaiaki ni ikotaki nakoia Tamnein te Uea, te tia kakorakora te ongeaba nakon Ana Tua, ao are tia kakoaua ae korakora nakon mimitongin Natin te Atua. I Bwa I aki ataia bwa iraua te ririki ngkana e a roko banen te ririki. I noria ngkana e tekateka n aki kakarongoa, ni kabanea raoi Ana Boki Moomon teuana riki te tai imwain banen te ririki

Inanon 1991 I kan anga te bwai n tangira ae onoti n te Kiritimati nakon au utu. Inanon tauan mwin kakoroan tain au tienero e kaotia bwa bon 12:38 p.m, Katenibong Ritembwa 18 ,1991 I a tibwa tia ni karaoa rawean Ana Boki Moomon ibukia kain au utu. Bon te namakin ae rikirake n au koaua n te mwakuri ae mimitong aio ao e korakora nanou bwa

N na taneiai ma baana ni karekei koaua man taian booki aika tabu ni kamanenaki n au mwakuri ibukin te Uea. I tangira te boki aio I kakoaua n rabwatau ma tamneiu bwa e katauraoki ibukin kakabwiaan te Bata ae Iteraera, ao bwaina nako ni katabwaninna ni kabuta te aonaaba. Te koraki ake a kamatebwaia kanoana ma te nanorinano, inanon te onimaki ni kakoaua inanon Iesu Kristo, a na ataa ngkai koauana ao a na kunea te kaubwai are e na kairiia nakon te kukurei ae moan te korakora ao ni maiuakinna inanon te maiu aio. I kakoaua ni kabane bwa e tabu, te boki aio e koaua.

Ti na kamanena ngaira n tatabemaniira kaubwain te kakabwaia are e reke man kamatebwaian te boki ae tabu. Inanon aran Iesu Kristo, amen

Bwaai aika a na taraaki

1.

Taraa Gordon B. Hinckley, "A Testimony vibrant and True," Riaona Aokati 2005, 6